



UNIVERSITÄTS-
BIBLIOTHEK
PADERBORN

Universitätsbibliothek Paderborn

Petri Danielis Huetii Demonstratio Evangelica

Huet, Pierre Daniel

Parisiis, 1679

Svmma Demonstrationis Evangelicae.

urn:nbn:de:hbz:466:1-16260

PROPOSITIO DECIMA.

Vera est Christiana Religio.

PAUCIS verbis concludetur ista Propositio. Religionem Christianam eam esse definivimus, quæ Iesum Nazarenum Messiam esse statuit, & quæcunque in Libris sacris, sive Veteris, sive Novi Testamenti, de eo scripta sunt, pro veris habet. Probatum est autem superiori Propositione Iesum Nazarenum esse Messiam, & quæcunque in Libris sacris, sive Veteris, sive Novi Testamenti, de eo scripta sunt, vera esse. Igitur Christianæ religionis fides circa res veras solum versatur, prorsusq; ei convenit quinto loco allata à nobis Definitio, qua statuimus Religionem veram eam esse, quæ res solum veras ad credendum propositas habet. Unde exoritur consecutarium hoc, veram esse Christianam religionem. Quod erat probandum.

ΠΟΡΙΣΜΑ.

Religiones omnes, præter Christianam, falsæ sunt & impie.

SI vera est Christiana religio, & res solum veras ad credendum propositas habet, ut definivimus, ex iis utique rebus una hæc est, solum Christianam Religionem esse veram, reliquias omnes falsas & impias. Palam id & libere coram Principibus Judæorum profatus est Petrus, cum de Christo sic dissereret: *Hic est lapis, qui reprobatus est à vobis edificantibus, qui factus est in caput anguli, & non est in alio aliquo salus: nec enim aliud nomen est sub celo datum hominibus, in quo oporteat nos salvos fieri.* Eamdem doctrinam Paulus Galatis tradidit: *Sed licet nos, aut Angelus de celo evangelizet vobis, preterquam quod evangelizavimus vobis, anathema sit. Sicut prediximus, & nunc iterum dico: si quis vobis evangelizaverit præter id quod accepistis, anathema sit.* Eadem & Timotheum docuit: *Unus enim Deus, unus & mediator Dei & hominum homo Christus Iesus.* Verum igitur est Religiones omnes, præter Christianam falsas esse & impias. Quod erat probandum.

S U M M A

DEMONSTRATIONIS EVANGELICÆ.

NUNC vero totam hanc Demonstrationem in pauca contractam & qui Lectoris ponamus ob oculos, ut uno intuitu perspectam & comprehensam suis queat momentis perpendere. Libri Novi & Veteris Testamenti iis temporibus scripti sunt, quibus feruntur esse scripti, & ab iis scripti, quibus tribuuntur. Hinc sequitur totam Jesu Nazareni historiam, in Veteri Testamento longe ante prædictam esse, quam evenerit in Novo. His porro concessis, libros nimurum Novi & Veteris Testamenti iis temporibus esse scriptos, quibus feruntur esse scripti, & ab iis scriptos, quibus tribuuntur, & Prophetias Veteris Testamenti de Jesu Nazareno, completas esse in Novo, consequens est veraces esse libros Novi & Veteris Testamenti. Quod si Prophetiae Veteris Testamenti de Jesu Nazareno, completæ sunt in Novo, & verae sunt libri Novi & Veteris Testamenti, ex eo efficitur Iesum Nazarenum esse Messiam. Quo posito, veraces nempe esse libros Novi & Veteris Testamenti, & Iesum Nazarenum esse Messiam, fatendum omnino est veram esse Religionem Christianam. Arctius adstringi non potest ratiocinatio hæc, totaque ita conferta est & contexta, resque alia ex aliis nexæ & inter se aptæ colligatione necessaria cohærent, ut nullis divelli argumentis, ratione nulla labefactari queant, nec assensum Lector possit abnuire: præsertim si animum hic adhibeat studiosum veritatis, non contumacem; tantumque his adjungat fidei, quæ à nobis demonstrata sunt, quantum aliis rebus soler adjungere, quæ pars roboris rationibus nituntur. Atque id nos postulavimus ab initio Operis hujus, & impetraturos speravimus.

EPI-